

Ing. Jossy Figaroa:

DOW ta lucha banda di Mampraca pa plazanan den Caya Grandi keda cla pa 21 di November

ORANJESTAD (AAN) – Matutino DIARIO a entrevista Ing. Jossy Figaroa, director di DOW, relaciona cu e etapa cu falta ainda pa keda cla cu e renovacion di Caya Grandi.

Director di DOW a señala cu DOW kier pa e proyecto aki wordo completa y nan ta den constante combersacion cu e compania contratista cu ta Mampraca.

Inf. Figaroa a indica cu e discusion mas grandi cu nan tin cu nan aworaki ta e cantidad di hendenan cu nan tin riba e trabao. Nan a pidi e compania pa pone mas hende traha pa e proyecto keda cla y pa nan sali for di e problema cu nan tin aworaki.

E compania a bisa na DOW cu nan ta bin cu 12 hende mas for di diaranzon awor, y a palabra cu pa dia 21 di November awor e trabaonan ta keda cla. Esaki ta e deadline cu DOW a pone nan, y si no keda cla pa e dia ey e problema di e compania cu gobierno lo bira mas grandi, Ing. Figaroa a subraya.

No obstante Ing. Figaroa a mostra nan cu si nan sigui cu e cantidad di hende cu nan tin trahando y na e speed cu nan ta haci e trabao, ta dificil cu nan ta bay logra.

Ing. Figaroa ta ripara cu tin hopi retraso den e Plaza Nikki Habibe, y cu esun riba Plaza Daniel Leo ta bayendo, pero tin un poco trabao ainda

cu falta y pa loke ta trata e Plaza Chipi Chipi, pabao di La Moderna tin detayenan cu mester sosode y dilanti Renaissance tambe tin cosnan pa caba aunke e ta bastante cla.

Ing. Figaroa a indica cu e compania contratista aki a wordo scoge a base di e prijs cu nan a duna. No ta un mal empresa pero e ta relativamente nobo, y nan no tabata sa con pa maneha e trabaonan y esaki a trece hopi discusion na caminda cu DOW.

Director di DOW a subraya cu e trabaonan ta kedando bon, y despues ta bin e terminio pa nan haci e trabaonan di mantenimiento y e ta spera cu hunto lo por keda bon cu otro.

El a agrega cu DOW tin e herment di kita e trabao for di e compania aki y dune otro contratista, pero esaki lo tuma hopi tempo y e financiamiento cu tin reserva mester

wordo cambia y pone riba otro nomber, y sigui e reglanan di contabilidad unda cu mester bay duna tempo na diferente contratista cu lo mester acerca pa duna nan oferta si mester bay den destaho publico y asina aki ni pa December lo bin cla cu e trabao. Pesey DOW ta lucha un poco mas cu e compania concerni pa wak si pa dia 21 di November nan keda cla cu e trabao.

